

BIBLIOTEKA  
SHTETIT


8JH-1

H53

7



**HESHTJA  
E NJE  
KOHE**



**POEZI  
NGA  
KOSOVA**


814-1

H53

# HESHTJA E NJË KOHE

Poezi nga Kosova

29583



SHTËPIA BOTUESE «NAIM FRASHËRI»

# SHKËMBIMET E TIRAZHIT

Tirazhi 1500 kopje

Format 70 x 100/32

Stash: 2204-72

---

**KOMBINATI POLIGRAFIK — Shtypshkronja e Re**

Tiranë, 1976

MAZLLUM SANEJA

## HESHTJA E NJË KOHE

Heshtjen e një kohe dua ta zgjoj.

Fjalët e shumë këngëve të pashkuara  
thellë mbeten në ne  
në shpirtrat tanë të lindur  
dhe në heshtjet e madhërishme.

Një ëndërr e llahtarshme fundoset  
në sytë e kaltër të liqenit virgjër,  
që unë e përfytyroja ashtu i humbur përmes

dritares

edhe blerimin e shkruar  
edhe qetësinë e tmerruar  
e atëherë, më dukej se ish vjeshtë e sëmurë  
vjeshtë e shkretëruar dhe e flijuar para kohe, ah  
e përcëlluar nga një dhembje e heshtur  
dhembje e përtypur, dhembje e dujgur  
e unë doja ta dijë tërë fshehtësinë  
e një heshtjeje të një kohe...

Ju thashë, heshtjen e një kohe dua ta zgjoj.

## TI, KURRË

**Ti kurrë nuk do të dish** për të shprehur  
për dhembjen e fshehur të pranverës.

**Ti kurrë nuk do të përardjesh** për të shprehur  
për vdekjen e thellë të një vere.

**Ti kurrë nuk do të dëgjosh** për të shprehur  
për zërin e shurdhër të një vjeshte.

**Ti s'di të shijosh magjinë e fshehur në atë varg**  
në të cilin është ndryemri yt.

# GRANADA

*(Federiko Garsia Lorkes)*

Oh, ç'është ajo flakë n'Granadë?  
Përse s'ndihet kitara?  
Ku janë vallet e jevgjëve?

Dy duar të hekurta,  
dy duar kasapësh  
gjak njeriu kërkuan  
gjak poeti fituan.

A vdes Granada?

## KËLTHITJE

**Thashë: një këngë të pikëlluar  
një fëmijë akoma e këndon,  
në horizont duket një yll i ndriçuar  
dhe në një thikë gjak pikon.**



## MALLËNGJIMI

Një natë të ëndërrova  
në thikën e dhembjes,  
nënë.

Plagët e tua  
që prajshëm i bartte  
në shpirtin e shtypur,  
kur endje pëlhurat e zonjave  
në avlëmendin e vjetëruar prej druri  
dhe dergjeshe nga një mori sëmundjesh,  
nënë.

Një natë dëshirova  
të të kem pranë,  
nënë  
se kujtimi yt  
më kall shpirtin e mendjen,  
o nënë, o nënë...

## THJESHTËSI E PASHKRUAR

Thua se kemi parandjerë edhe më parë  
se mes nesh do t'lindët për të mbëtur përmot  
vjershtëtori që ndjenjën e ka zjarr  
e që pezmin e hidhur në lyrë do t'na thotë

## ETJE

Dy duar të padukshme  
kaheër grishin dashurinë,  
dy duar të padukshme  
kaheër kërkojnë bukurinë.

Ç'etje dashuric,  
ç'etje bukurie  
digjet në shpirtin tim,  
o vargu im.

## KJO ËSHTË BUKA JONË

Dielli është diell  
vetëm kur ka zjarr.

Fjala është fjalë  
kur e ka peshën e gurit.

Kënga është këngë  
kur matet me dhëmbë e dashuri.

## **SHPESHHERË**

Shpeshherë ulem në pluhur  
para shtëpisë sime trarënxira  
dhe shkruaj vjersha për tokën,  
për blozën, për njeriun tim,  
plakun e thimë, punëtorin analfabet,  
fshatarin bujar,  
që shtron sofrën e varfër para miqve,  
thotë: trima, bukë, kripë e zemër,  
në shpirt jemi të pasur,  
jemi të bardhë.

# NJË FSHATAR DUKE LEXUAR NJË LIBËR

Ky është për t'u flakur,  
libër biblë.

Këta tinguj nuk rrëfejnë  
për sytë e ballit tim.

Nga fillimi gjer në fund  
jetë e pajetuar,

të urtë jemi

të urta i duam këngët,

të thjeshtë jemi,

të thjeshta i duam këngët.



29583

## LAGJIA

Lagjia ime e urtë,  
lagjia ime e trembur,  
po e varros hijen e gjakimit.

Fqiu i parë  
është dashuruar në fqiuin e dytë,  
fqiu i tretë e pa këtë bukuri,  
fqiu i katërt e ndjeu ngjyrën e gjakut  
dhe syrin e dritës.

Fqinjte e mi të urtë  
janë kthyer me sy kah dashuria.

**MEHMEDALI HOXHA**



## NJË BREZ LIVADH

Një brez livadh  
edhe një dhi,  
ç'kujtime të tjera  
t'ju them tani  
për fëmijërinë time!...

Sa plaste agimi  
dilnim fushës;  
bari gjer te sytë  
e lulet e fushës  
na mbushnin me gëzime.

Dhe të kreshpëruar  
këngës ia thonim  
me fije mbuluar,  
librat ëndërronim,  
mullarëve në kërcime.

Të gjitha gëzimet  
kështu i festonim,  
të gjitha tronditjet  
kështu i përjetonim,  
në skamje, frikë e dëshpërime...

Një brez livadh  
edhe një dhi,  
ç'kujtime tjera  
t'ju them tani  
për fëmijërinë time!...

# KOLONA PARTIZANE

*Radolishtit tri herë të djegur*

Gjarpëronte kolona  
e në agim,  
me gjak dëshmorësh vaditur,  
shpërtheu edhe një kushttrim.

Mbi qafë zgjedha  
e paduruar  
u bë për ne  
e si rrufe  
duhej flakëruar  
me gjak të shkruar  
ashtu si na the.

Gjarpëronte kolona  
e në fshatin tim  
si valë e dergjur kulçedra  
mbolli edhe një trishtim.

Tri herë me radhë  
gjaku gërmadhë  
u derdh përdhe  
e si rrëke  
e njomi fushën,  
pyllin e fshatin  
ashtu si dje.

Gjarpëronte kolona  
e në kushtrim  
buzë vetullës së shpatit  
ngadhnjeu edhe një agim.

Kur fshati, mali  
bashkohen tok  
e si dy shokë  
kërkojnë liri,  
s'ka më fuqi  
që u del përpara  
as dje, as tani.

## VENDLINDJA IME

Zemra më gufon  
e malli më merr gjithmonë  
për fshatin, vatrën, rrugët  
në gëzime...  
S'ka si rrugica ime!

Gjarpëron ajo  
në jetë, në mua, kudo  
dhe zbukuron fshatin e vuajtur  
në ngadhnjim...  
S'ka si fshati im.

Të ec rrugëve  
me shelgje stolisur, urave  
që krojet e përshkojnë plot jetë  
e kujtime  
s'ka si vendlindja ime.

Rrugëve, po  
ku kam luajtur si fëmi'  
dhe kam bërë ndonjë marrëzi  
të shkoj të bredh  
në dëfrime...  
Vërtet, s'ka si vendlindja ime!

## NJË MAJIT

Brohoritni  
duarlart sa jeni  
dhe shikoni  
lulkuqen ta keni  
në shtëpi.

Ajo ditë  
duhet kujtuar  
gjaku pikuar  
e njomi dhenë  
që zogu i vogël  
krahëhapur  
ta ketë folenë  
me stoli.

Këndoni  
zemër plot ku jeni  
dhe kërkoni  
lulkuqen ta keni  
në shtëpi.

Ajo ditë  
është lot gëzimi,  
lule blerimi  
që hijeshon dhenë.

I madh, i vogël  
ballëhapur  
t'ia thot' këngës  
në liri.

## NJË NATË

U përpoqa një natë  
Sy, o biri im  
të shkruaj një vjershë  
ashtu pa fillim.

Ç'është, kjo që terri  
më bën të trishtuar  
e kur lind dielli  
më bën të gëzuar!

Dëgjoj çilsa, uri,  
me grile rrethuar  
vuajtje masakrime  
netët pa mbaruar.

Rreth e përqark meje  
lodrat i zë gjumi  
kërcet zjarri n'vatër,  
fushës përshkon lumi.



Kështu pra një natë  
pa gjumë në trishtim  
u përpoqa të shkruaj  
një vjershë pa mbarim.

A di gjë për luftën  
Sy, o biri im,  
fushës Vietnamit  
që mbolli pik'llim!

Atje lodrat s'flinin,  
n'roje babë e bir  
dhe të dy mbaronin  
trim, hero, martir!

Atje e kudo qoftë  
jeta pa liri —  
është e zezë, e rëndë  
bir për çdo njeri...

Kështu, pra, një natë  
u përpoqa të shkruaj  
një vjershë pa fillim  
një vjershë pa mbarim.

## NATËN

Natën... çdo gjë pushon  
vetëm nëna,  
vetëm nëna  
fëmijën e përqafon.  
Dhe këndon  
dhe këndon:

Fli, bir i nënës, fli  
syrin si ulli,  
t'paça me laps e letër  
e m'u bëfsh plak me mjekër.

Natën... çdo gjë heshtur  
vetëm lumi,  
vetëm lumi  
e mat kohën që kalon  
dhe tregon  
dhe tregon:

Ishte një herë një i ri  
trim i rrallë që besa  
luftoi, luftoi për liri  
katër vjet si vesa...

Natën çdo gjë pushon  
vetëm hëna,  
vetëm hëna  
rretheqark lundron  
dhe ëndërron  
dhe ëndërron:

Krahëhapur mbi re  
vocrrakët fluturojnë  
në anijet me vela  
lundrojnë, lundrojnë...

## TRIMAT E SREMIT

Ishte fillim i një stine...  
Po gjëmon,  
pëlcasin minat e Sremit.

Ishte mesi i një nate...  
Po kërcet  
në hapsirat e Sremit  
Brigadë e Shtatë shqiptare  
vret e pret.

Erdhi fundi i një lufte  
ngadhnjyen trimat e Sremit.

**FLORA BROVINA**

## VERMA EMRIN TIM

Nëse më njeh — e di emrin tim  
ka emrin e fluturimit.

Nëse e di emrin tim, mos më thirr fluturim  
Nëse më ke parë — e di kush jam,  
i kam krihët e thëllëzës.

Nëse e di kush jam, mos më thërrit thëllëzë.

Nëse ke dëgjuar këngën time — e di si këndoj,  
vëlla e kam bilbilin.

Nëse e di si këndoj, këngën mos ma ndal.

Nëse lotët i urren — e di se unë nuk qaj,  
qyqen nuk e kam fis.

Nëse e di se nuk qaj, mos më thuaj se nuk ndjej.

## NATA E KOBEVE

Atë natë edhe hëna qau  
si nëna në zi,  
atë natë vdiq Ganimeti <sup>1)</sup>  
u fik një dashuri.

Atë natë shpendit iu këputën krahët,  
atë natë pranvera mbaroi  
e lulja u tha,  
atë natë pikëllimi zëmrën e shpoi,  
atë natë, o natë e kobeve:

Atë natë, por...  
Ganimeti edhe tani jeton  
në rininë time.

---

1) Vrarë nga fashistët.

## PORTRETI

Liqen ngjyrash,  
sa shumë ngjyra  
ngjyrosi me të kuqe,  
kjo të ngjan ty.  
Sa shumë ngjyra!  
Rruga jote e kuqe,  
tërë jeta e kuqe,  
edhe qielli më i bukur,  
i kuq është.  
Sa pikturë e madhe, sa e kuqe!



## VALLJA

E di një valle, e di një valle të madhe,  
do t'ju përshpëris të gjithëve,  
e di një valle pa daulle e tupana,  
pa dimia e mintana,  
por të bukur.

E di një valle me hapa të lehtë,  
dora-dorës, hapa-hapës dhe përpjetë;  
e di një valle, me shoqet e mia  
do ta hedhim të madhe

në ditën që do t'vij.

## KUR UNË SHKRUAJ

Unë shkruaj poezi  
në orë të vonë;  
ti ndoshta gazetën shfleton  
apo fle e qetë.

Unë shkruaj poezi  
në një skutë, në shtëpi  
ti ndoshta qan, dënes  
a qëndis  
pajën e nusërisë.

Unë shkruaj poezi dhe kam besim  
që nesër  
ndoshta edhe te ti  
do të vijë vargu im.

## MËNGJESI I QYTETIT TIM

Rrugët herët janë zgjuar,  
qyteti s'bën zhurmë,  
e heshtas i sodis hapat e ditës së re,  
njerëzit ecin, ecin dikah  
me përshëndetje dhe dëshira në gojë  
për mirëmëngjes.

Hapat kërcasin në trotualet e pastruara,  
si çekana fabrikash si maqina shkrimi  
dhe çdo gjë është përngut  
dhe mëngjesi që ikën shpejt.

Rrugët herët janë zgjuar  
bashkë me shitësin e gazetave  
me bartësin e qumështit e lustraxhiun.  
Kalimtarët ecin, ecin dikah  
dhe një grua me fëmijë në krah...

## NË PERON

...Askend s'e përcolla sonte  
në trenin që nxitoi  
në takim kah peroni tjetër.  
Sonte pres ardhjen e trenit të mesnatës,  
pres sonte unë, nuk përcjell  
dhe eci...  
e peroni kotet i lodhur  
nga pritjet dhe përcjelljet pambarim.  
Eci e s'e lë të flejë  
(le të më bëjë shoqëri).  
Unë pres trenin e mbramë të mesnatës  
në orën e madhe  
akrepat akoma luajnë lotët e tyre  
takohen e ndahen për t'u takuar.  
Unë eci...  
Një plak dremitet i lodhur,  
pret edhe ai në këtë orë të vonë  
nisjen e trenit të mesnatës  
dhe eci...

## KUKËLLZA

Ti hesht belbëzimet e mia,  
hapat e para, nisjet e para,  
ëndërrat e saja të bardha,  
oj kukëllëz,  
ti hesht bëlbëzimet e mia  
edhe atëherë kur shkoi fëmijëria,  
lodër e fëmijërisë,  
e imja kukëllëz  
tani hesht  
në krahët e mia  
çupëz.

## VOGËLUSHJA

Mos, mos qaj vogëlushe, ti  
e dashur mos qaj,  
se jeta ka dhe vaj  
por ti... mos qaj.

M'i zgjat duart,  
mbështetu në kraharorin tim  
e me dënesje,  
më jep tënden dhimbë.

E dashur mos qaj  
mos vogëlushja ime.  
E, nëse në zemër ke shumë vaj,  
më lejo dhe mua të qaj.

## SHOQJA IME

Të takova në kalim  
duke ecur me nxitim,  
e habitur se s'të pashë,  
shoqe e klasës sime, thashë!

Përdore një vogëlushe mbani,  
shoqe e klasës ti je nënë?!  
Vogëlushi qesh me ëmbëlsi,  
unë të shikoj, të kam lakmi.

## UNË DHE NJERËZIT

Unë eci  
e rreth meje  
njerëzit  
ecin, ndalen, shkojnë.

Unë eci,  
njerëzit ecin ngadalë,  
me shpejtësi  
e në mua qetësi.

Ata ecin  
e askush nuk di  
se jam vetëm,  
se kam zbrazëti...



## KUR BIE SHI

Kur bie shi pullazet lahen,  
kur bie shi strehët lotojnë,  
rrugët bëhen lumënj  
e në mua vërshon malli.

## KOHA QË MË IKËN

Pse je kaq e lazduar dhe nget si e marra,  
e pyeta një ditë duke i folur në kalim.  
Ajo më hipi në buzë dhe nuk m'u përgjegj.  
Ndal! i thashë që të mundem të të shoh.  
Ajo hipi në shikimin tim dhe u bë mjegull.  
Pse je kaq e lazduar, nget e më ikën?  
Ajo hipi në hapin tim dhe nuk m'u përgjegj.

Kush ngiste më shpejt ajo apo unë?

**BEDRI HYSA**

## KALI I TROJËS

N'galop kozmik bredh i Trojës kali  
me t'tetat fluturimthi-n'për meridane,  
ndër frerë i maskuar e mban kanibali  
shkëndia duke nxjerrë në tokë prej çdo ane.

Njerëz të mi, nxirrni bedenat e moçëm plot gjak,  
për mirëseardhje t'ia shtrojmë atij n'udhë  
e për zemra të mbahemi pa as një lak:  
të shihni n'theqafje se ç'ka për t'u hudhë.

## NË TOKËN TIME...

Në tokën,  
nën këmbë të mia  
e kam edhe zemrën.

Qielli mbi kokën time,  
gjer në kupë është imi.

Uji rreth meje  
është kënga e jetës sime

Tokën  
qiellin  
ujin  
i barta në trashëgim.

Tani  
përse kjo blozë?

## TIM BIRI

Yjt për ty do t'i rreshtoja për çdo hap,  
ecjen tënde e ndjej nëpër krahërof,  
me zemrën time të kapur vrap,  
ec drejt njeriut të thjeshtë madhështor.

## FSHATARI IM

Fshatari im ka kësulën e bardhë,  
fjalën e urtë dhe shumë të rrallë.

Zemrën si kësula e ka, të gjerë sa deti,  
me fuqi vullkani që fle në veti.

Nga brendi e thellë rrjedhin melodi,  
që krijojnë simfoni,  
nga ky shpirt i rrallë, nga kjo bukuri...

# HEROIZËM

Heroizëm është  
edhe rasti i dhënë  
por vështirë është, vështirë  
miku im  
të jesh hero  
gjatë tërë shekullit tënd  
madje  
edhe pas tij.

## LARGËSI E AFËRT

Largësi e afërt,  
afërsi e largët,  
në mes  
zjarri brambull,  
i madh sa një diell  
e nga flakadani  
në galaksion  
do fluturojnë pëllumbat e kuq  
të zjarrit,  
do shtohen yjet në qiell.





## PASQYRA E LËNDËS

### MAZLLUM SANEJA

Heshtja e një kohe .....	5
Ti, kurrë .....	6
Granada .....	7
Këlthitje .....	8
Mallëngjimi .....	9
Thjeshtësia e pashkruar .....	10
Etje .....	11

### TAHIR FONIQI

Kjo është buka jonë .....	15
Shpeshherë .....	16
Një fshatar duke lexuar një libër .....	17
Lagjia .....	18

### MEHMEDALI HOXHA

Një brez livadh .....	21
Kolona partizane .....	23
Vendlindja ime .....	25
Një Majit .....	26
Një natë .....	28
Natën .....	30
Trimat e Sremit .....	32

## FLORA BROVINA

Verma emrin tija .....	1
Nata e kobeve .....	2
Portreti .....	3
Vallja .....	4
Kur unë shkruaj .....	5
Mëngjesi i qytetit tim .....	6
Në peron .....	7
Kukëllza .....	8
Vogëlushja .....	9
Shoqja ime .....	10
Unë dhe njerëzit .....	11
Kur bie shi .....	12
Koha që më ikën .....	13

## BEDRI HYSA

Kali i Trojës .....	14
Në tokën time .....	15
Tim biri .....	16
Fshatari im .....	17
Heroizëm .....	18
Largësi e afërt .....	19